
**ՀԱՅԿԱԿԱՆ ՀԱՐՑԸ 1945Թ. ԽՈՐՀՐԴԱ-
ԹՈՒՐԲԱԿԱՆ ՀԱՐԱԲԵՐՈՒԹՅՈՒՆՆԵՐԻ ԼՈՒՑՄԻ ՆԵՐՔՈ**

ՄԵԼՔՈՆՅԱՆ Ք. Ֆ.

Երկրորդ համաշխարհային պատերազմի տարիներին Թուրքիայի վարած, այսպես կոչված, «ակտիվ չեզոքության» քաղաքականությունը՝ հոգուտ ֆաշիստական Գերմանիայի, պատերազմի ավարտից հետո հանգեցրել էր խորհրդա-թուրքական հարաբերությունների վատթարացմանը և Հայկական հարցի բարձրացման ու լուծման համար նպաստավոր պայմաններ էր ստեղծել: Այդպիսով, երկարատև լռությունից հետո, 1945 թ. հայկական հողային հարցն առաջ քաշվեց ու նորից դարձավ մեծ տերությունների քննարկման առարկա: Այն վերաբերում էր ոչ թե ամբողջ Արևմտյան Հայաստանին (չնայած սփյուռքահայությունն այդպիսի պահանջ էր ներկայացրել), այլ միայն Կարսին և Արդահանին, որոնք 1921 թ. Կարսի պայմանագրով տրվել էին Թուրքիային: Կարսի և Արդահանի հարցը ոչ հրապարակայնորեն առաջ էր քաշվել դեռևս 1940 թ. նոյեմբերին՝ ԽՍՀՄ-ի արտգործնախարար Վ. Մոլոտովի՝ Բեռլին կատարած պաշտոնական այցի ընթացքում: Գերմանական կողմը «Թուրքիային վերաբերող զրույցում ասել էր, թե իրենք դեմ չեն, որ ԽՍՀՄ-ը նույնիսկ Կարսը և Արդահանը Թուրքիայից վերցնի»¹: Մակայն այս հարցը լայն քննարկման թեմա է դարձել ավելի ուշ՝ Երկրորդ համաշխարհային պատերազմից հետո, այսինքն՝ 1945 թ.:

Խորհրդա-թուրքական հարաբերություններում սառեցումը նկատվել էր դեռևս Աթաթուրքի կյանքի վերջին տարիներին, իսկ 1945 թ. ստեղծվել էր պայթույնավտանգ իրավիճակ: Ֆաշիստական Գերմանիային հաղթած Խորհրդային Միությունը չէր կարող մոռանալ պատերազմի տարիներին՝ Թուրքիայի վարած քաղաքականությունը, մասնավորապես այն, որ 1941 թ. հունիսի 18-ին Խորհրդային Միության վրա հարձակվելուց չորս օր առաջ Թուրքիայի և Գերմանիայի միջև գաղտնի կնքվել էր բարեկամության դաշնագիր²: Բացի այդ, Թուրքիան այդ տարիներին չէր թաքցնում իր ատելությունը ԽՍՀՄ-ի նկատմամբ: Թուրքիայում ԱՄՆ-ի դեսպան Մաջմուրայը, 1941թ. հունիսի 22-ի իր զեկուցագրում ԱՄՆ-ի կառավարությանը տեղեկացրել էր, որ «թուրք իրավասուներն ուրախությամբ են ընդունել խորհրդա-գերմանական պատերազմի սկսվելը», այնուհետև ավելացնելով, թե «այս ուրախությունը նրանք բացատրում են այն բանով, որ երկու գանգասեր երկար պայքարի վերջում, թուլացնելով մեկը մյուսին, հոգնած կընկնեն»³: 1941 թ. հոկտեմբերի 5-ին էլ թուրքական «Ուլուս» թերթը իմիջիայլոց

¹ Peter de Mendelssohn, *The Nuremberg Documents*, London, 1946, p. 258-259.

² *Правда*, 27.III. 1947.

³ Cüneyt A., *Şeytan İçgeninde Türkiye*, Ankara, 1987, s. 51.

⁴ *Սահակյան Ռ. Գ.*, Սովետա-թուրքական հարաբերությունների պատմության հակա-գիտական լուսաբանումը ժամանակակից թուրք պատմագրության մեջ, Ե., 1964, էջ 94:

գրել էր, թե Գերմանիան շատ ճիշտ է արել ԽՍՀՄ-ի վրա հարձակվելով⁴։ Թուրքական մամուլն այդ տարիներին լեցուն էր հակախորհրդային և պանթուրքիստական նյութերով։ Օրինակ, «Բոզ քուրթ» («Գորշ գայլ») թերթը 1941 թ. հրապարակել էր Մեծ Թուրքիայի քարտեզը, որի մեջ ընդգրկված էին Խորհրդային Միության անդրկասպյան և անդրկովկասյան տարածքները⁵։ Իսկ հետպատերազմյան գերմանական փաստաթղթերից հայտնի է դառնում, որ Թուրքիան ծրագրել էր ԽՍՀՄ-ի վրա հարձակվել Կովկասի ուղղությամբ (Բաքուն գրավելու նպատակով)⁶։ Միայն 1942 թ. աշնանը թուրքական 26 դիվիզիաներ կենտրոնացված էին խորհրդա-թուրքական սահմանի մոտ։ Նրանք ակնկալում էին Ստալինգրադի անկումը՝ Անդրկովկաս (ավելի ստույգ Հայաստան) ներխուժելու համար։ Հայության համար դա նշանակում էր մի նոր ցեղասպանություն։ Հայկական փաստաթղթերն էլ են հաստատում, որ 1941-1942 թթ. արտակարգ լարված իրավիճակ էր Լենինականի (Գյումրի), Իգդիրի, Ախալքալաքի և Բաթումի շրջակայքում, որտեղ առկա էր թուրքական հարձակման իրական վտանգ⁷։ Սակայն Գերմանիան 1943 թ. փետրվարին պարտություն կրեց Ստալինգրադում, և Թուրքիան ստիպված եղավ որոշ չափով փոխել իր պահվածքը։ Չնայած դրան, Թուրքիան շարունակում էր խախտել Մոնտրյոյի (1936 թ.) համաձայնագիրը՝ գերմանական և իտալական նավերին թույլատրելով օգտվել Սևծովյան նեղուցներից։ Բացի այդ, Թուրքիան առանցքի երկրներին մատակարարում էր քրոմ և այլ ռազմավարական նշանակության հումքեր։ Եվ երբ Ղրիմի կոնֆերանսում (1945թ. փետրվարին) քննարկվում էր ՄԱԿ-ին անդամակցության հարցը, և որոշվել էր հիմնական անդամներ ընդունել Գերմանիայի դեմ պատերազմ հայտարարած երկրներին, Ի. Ստալինը Ու. Չերչիլի պնդումով համաձայնվեց Թուրքիան ընդգրկել ՄԱԿ-ի հիմնական անդամների կազմում՝ Անկարայից պահանջելով մինչև 1945 թ. փետրվարի վերջը պատերազմ հայտարարել առանցքի երկրներին⁸։ Թուրքիան, Մեծ Բրիտանիայի և ԱՄՆ-ի ճնշմամբ, 1945 թ. փետրվարի 23-ին պատերազմ հայտարարեց Գերմանիային և Ճապոնիային՝ ռազմաճակատ չուղարկելով և ոչ մի զինվոր։

1945 թ. Թուրքիայի կառավարությունը քաջ գիտակցում էր, որ պատերազմի տարիներին Թուրքիայի վարած քաղաքականությունն ունենալու է ծանր հետևանքներ։ Հասկանում էր, որ Խորհրդային Միության՝ «գերտերության» նոր կարգավիճակը թույլ էր տալիս Թուրքիայի նկատմամբ կիրառել պատժամիջոցներ։ Այդ առիթով թուրք պատմաբան Թահսին Ունալը գրել է. «Ռուսաստանի քաղաքական նպատակը իմանալով և մեր բարեկամներ Անգլիայի և Ամերիկայի խորհրդից հետո մենք 1945 թ. Գերմանիայի և Ճապոնիայի դեմ պատերազմ

⁵ Edward Reginald Vere Hodge, *Turkish Foreign Policy during 1918-1948*, Geneva, 1950, p. 143.

⁶ Правда, 27. III. 1947.

⁷ Հայրությունյան Ա.Հ., Հայ ժողովրդի ավանդը հաղթանակի կոփման գործում (Բանբեր Հայաստանի արխիվների, 1975, N 1, էջ 137)։

⁸ Թեհրան, Ֆալթա, Պոտսդամ. փաստաթղթերի ժողովածու, Ե., 1970, էջ 137։

հայտարարեցինք և բնականոն ձևով մտանք պատերազմի մեջ»⁹։ Չնայած այս քայլով Թուրքիան հնարավորություն ստացավ դառնալու ՄԱԿ-ի անդամ և օգտվելու արևմտյան երկրների հովանավորությունից, սակայն չկարողացավ մեղմել ԽՍՀՄ-ի վերաբերմունքը, որը ցանկանում էր վերահաստատել Ռուսական կայսրության 1914 թ. պետական սահմանները։ Այդ ծրագիրն իրականացնելու համար Խորհրդային Միությունն արդեն վերադարձրել էր նախկինում ցարական Ռուսաստանին ենթակա, իսկ 1918-1939 թթ. իրենց անկախությունը պահպանած մերձբալթյան երկրները։ 1944 թ. Ֆինլանդիայի հետ կնքված զինադադարի համաձայն, վերահաստատվել էին 1940 թ. խորհրդա-ֆիննական սահմանները, և այդպիսով, ԽՍՀՄ-ին էին անցել Պետսամոն և Արևմտյան Կարելիայի մի մասը՝ Ռումինիայի հետ 1944 թ. երեք մեծ տերությունների ստորագրած զինադադարի համաձայն, Խորհրդային Միությանը Ռումինիայից անցել էին Բեսարաբիան և Հյուսիսային Բուկովինան, Յալթայի կոնֆերանսում որոշվել էր պահպանել խորհրդա-լեհական՝ 1941 թ հունիսի 22-ին եղած սահմանը, այսինքն՝ ԽՍՀՄ-ին մնացին նախապատերազմյան Լեհաստանի արևելյան շրջանները։ Խորհրդային Միությանն էին անցել Գերմանիայից՝ Արևելյան Պրուսիայի շուրջ կեսը՝ Քյոնիգսբերգ (Կալինինգրադ) քաղաքը իր շրջակայքով, Չեխոսլովակիայից՝ անդրկարպատյան շրջանները, Ճապոնիայից՝ 1905 թ. ռուս-ճապոնական պատերազմի հետևանքով Ռուսաստանի կորցրած Հյուսիսային Սախալինը և Կուրիլյան կղզիների մեծ մասը։ Մնում էր միայն վերահաստատել ցարական Ռուսաստանի և Օսմանյան կայսրության 1914 թ. պետական սահմանները։ Այսինքն՝ վերադարձնել Կարսը և Արդահանը։

Միաժամանակ, միտում կար բավարարելու Խորհրդային Միության այն բոլոր հանրապետությունների պահանջները, որոնք մեծ ներդրում էին ունեցել ֆաշիստական Գերմանիայի դեմ հաղթանակում։ Այդ հանրապետություններից էր նաև Խորհրդային Հայաստանը, որի միակ պահանջն Արևմտյան Հայաստանի տարածքների հարցն էր։ Առաջին անգամ Խորհրդային Միության և համայն հայության շահերը համընկնում էին։ Շեշտենք, որ Խորհրդային Միության՝ Թուրքիային տարածքային պահանջներ ներկայացնելու որոշմանը նպաստել էին ոչ միայն տարածքի ընդլայման ծրագիրը և հայ ժողովրդի արդարացի պահանջը, այլև պատերազմի տարիներին չեզոքության քողի տակ Անկարայի վարած հակախորհրդային քաղաքականությունը։

1945 թ. մարտի 19-ին Վ. Մոլոտովը, ԽՍՀՄ-ում Թուրքիայի դեսպան Սելիմ Սափերին տեղեկացրեց, որ Խորհրդային Միությունը մտադիր է չեղյալ հայտարարել 1925 թ. դեկտեմբերի 17-ի «Բարեկամության» պայմանագիրը¹⁰։ Ավելի ուշ, ի պատասխան Թուրքիայի այն հայտարարությանը, թե իրենք պատրաստ են Մոսկվայի հետ նոր համաձայնագիր կնքել ցանկացած պայմաններով¹¹, ԽՍՀՄ-ը

⁹ Tahsin Unal, 1700 den 1958 e kadar Türk Siyasi Tarih, Ankara, 1958, s. 291.

¹⁰ Внешняя политика Советского Союза в период Великой Отечественной войны, т. III, М., 1946, с. 146.

¹¹ Նույն տեղում, էջ 148:

շտապեց ներկայացնել իր պահանջները՝ տեղեկացնելով, որ մինչև նոր համաձայնագիր ստորագրելը անհրաժեշտ է լուծել ինչպես սևծովյան նեղուցների հարցը, այնպես էլ կարգավորել խորհրդա-թուրքական սահմանները¹²։ Խոսքը Կարսի և Արդահանի մասին էր։ Սա Խորհրդային Միության խաղաքարտն էր՝ պատերազմի տարիների Անկարայի հակախորհրդային քաղաքականության դիմաց ներկայացրած հաշիվը, որից այդքան վախենում էին թուրքերը։ Չնայած Թուրքիան ձգտում էր վերականգնել խորհրդա-թուրքական պայմանագիրը, սակայն ոչ այս հողերի հաշվին։ Այս պահանջներն անընդունելի էին նրա համար։ Ինչպես վկայում են թուրքական փաստաթղթերը, հունիսի 7-ին Մոսկվայում կայացած Մոլոտով-Մափեր հանդիպման ժամանակ Թուրքիայի դեսպանը հայտարարել է, թե այս առաջարկներից ոչ մեկը Թուրքիայի կառավարությունը չի ընդունի, այնուհետև հիշեցրել, որ «սահմանների կարգավորման դաշնագիրը Խորհրդային Միության համաձայնությամբ կնքվել է 1921 թ.»¹³։ Վ. Մոլոտովը պատասխանել է. «Բայց այդ ժամանակ Խորհրդային Միությունը թույլ էր, իսկ այժմ ուժեղ է։ Այդ պատճառով էլ համաձայնագրում փոփոխության առաջարկ է արվել»¹⁴։

Հասկանալի է, որ Թուրքիան հայտնվել էր դժվարին իրավիճակում, որից դուրս գալու համար անհրաժեշտ էր հզոր դաշնակից, որը կարող էր դիմակայել Խորհրդային Միությանը։ Այդպիսի դաշնակիցներ դարձան Մեծ Բրիտանիան և ԱՄՆ-ը։ Չնայած նրանք էլ սկզբնական շրջանում խորհրդա-թուրքական հարաբերություններում փորձում էին չեզոքություն պահպանել, սակայն պատերազմից հետո մեծ տերությունների ղեկավարների միջև կայացած հանդիպումների ընթացքում քննարկվել է Թուրքիային Խորհրդային Միության ներկայացրած ինչպես սևծովյան նեղուցների, այնպես էլ հայկական հողերի հարցը։

Վերջինս 1945 թ. առաջին անգամ քննարկվել է Պոտսդամում։ 1945 թ. հուլիսի 16-ին ԽՍՀՄ-ի և Մեծ Բրիտանիայի արտգործնախարարների հանդիպման ժամանակ Ա. Իդենը Վ. Մոլոտովին տեղեկացրել էր, որ Լոնդոնում իր մոտ են եկել թուրքերը, և ինքը հետաքրքրություն է ցուցաբերել Թուրքիային ԽՍՀՄ-ի ներկայացրած հայկական հողերի պահանջների վերաբերյալ¹⁵։ Վ. Մոլոտովը պատասխանել է. «1921 թ. թուրքերը օգտվեցին այն բանից, որ Խորհրդային Միությունը թույլ էր և խլեցին Խորհրդային Հայաստանի մի մասը։ Խորհրդային Միության հայերն էլ վիրավորված են զգում իրենց։ Այդ հանգամանքը նկատի ունենալով՝ խորհրդային կառավարությունը հարց է բարձրացրել, որպեսզի օրինական ճանապարհով վերադարձվեն Խորհրդային Միությանը պատկանող հողերը»¹⁶։ Միաժամանակ, Խորհրդային Միության արտգործնախարարը

¹² Cüneyt A., նշվ. աշխ., էջ 289.

¹³ Նույն տեղում, էջ 293:

¹⁴ Նույն տեղում:

¹⁵ Советский Союз на международных конференциях периода Великой Отечественной войны, т. VI, М., 1980, с. 41.

¹⁶ Նույն տեղում, էջ 40-41:

հիմնավորել է հայկական հողերը վերադարձնելու անհրաժեշտությունը՝ պնդելով, որ «Այս տարածքները, որոնց մասին է խոսքը, չեն պատկանում թուրքերին»¹⁷:

Այս հարցի քննարկումը նույն ոգով շարունակվել է Պոտսդամում՝ Ստալին-Չերչիլ-Տրումեն հանդիպմանը: Երբ հուլիսի 23-ի նիստում Մեծ Բրիտանիայի վարչապետ Ու. Չերչիլը հանդես է եկել Թուրքիայի պաշտպանությամբ, Ի. Ստալինը հայտարարել է. «Խոսքն այն մասին է, որ վերականգնվեն մինչև I համաշխարհային պատերազմը եղած սահմանները: Ես նկատի ունեմ Կարսի մարզը, որը մինչև պատերազմը գտնվում էր Հայաստանի կազմում և Արդահանի շրջանը, որը մինչև պատերազմը գտնվում էր Վրաստանի կազմում»¹⁸: Ի. Ստալինի կողմից Արդահանը վրացական տարածք հայտարարելը անակնկալ էր բոլորի, նաև հայերի համար: Այդ ժամանակ ոչ ոք չէր էլ կարող պատկերացնել, թե մի քանի ամիս անց (դեկտեմբերին), Հայաստանից բացի, Թուրքիային հողային պահանջներ է ներկայացնելու նաև Վրաստանը: Այդ ընթացքում Անկարան համախոհներ և դաշնակիցներ էր փնտրում՝ Լոնդոն և Վաշինգտոն պատվիրակություններ ուղարկելով: Թուրքիայի խնդիրն այդ ժամանակ Մեծ Բրիտանիայի դիվանագիտության համար գլխացավանք էր դարձել: Նրան միայն հետաքրքրում էր սևծովյան նեղուցների հարցը: Լոնդոնը Անկարային հասկացրել էր, թե ցանկանում է նեղուցների հարցը զատել թուրք-խորհրդային դաշնագրի վերանայման խնդրից¹⁹: Անգլիան խոստանում էր օգնել նեղուցների հարցում, իսկ Կարսի և Արդահանի հողային պահանջների խնդրում Թուրքիան ինքն էր մտածելու իր մասին: Բիարկե, այս առաջարկն անընդունելի էր Անկարայի համար, քանի որ նրա համար նեղուցները և արևելյան նահանգներն ունեին նույն կարևորությունը: Թուրքիան Խորհրդային Միության պահանջների հարցում իր տեսանկյունը ներկայացրել էր Սան-Ֆրանցիսկոյի ՄԱԿ-ի վեհաժողովում և Լոնդոնում կայացած արտգործնախարարների խորհրդին՝ նշելով, որ «...ինք այս խնդիրը կյանքի և մահու հարց մը կը նկատեմ և հայկական սահմանին վրայ առանց իր համաձայնութեան կատարած ունե փոփոխութեան պիտի չենթարկվի»²⁰:

Թուրքիայի պաշտոնական շրջանակները, իրենց հերթին, ինչպես ցույց է տալիս այդ տարիների սփյուռքահայ և օտար մամուլը, լրություն էին պահպանում Խորհրդային Միության պահանջների իրական բնույթի մասին: Այս հարցում Թուրքիայի դիրքորոշումը ներկայացվել էր Թուրքիայի նախագահ Իսմեթ Ինոնուի՝ նոյեմբերի 1-ի ելույթում, որտեղ անդրադառնալով Թուրքիայի՝ պատերազմի տարիների պահվածքին, նա հաստատել էր, որ, իրոք, Գերմանիայի հետ դաշնագիր են կնքել, իսկ Անդրկովկասի սահմանագլխում գորամիավորումների կենտրոնացմամբ իբր ցանկացել են կանգնեցնել ֆաշիստական Գերմանիայի մուտքը Կովկաս: Վերջում Ի. Ինոնուն շեշտել էր. «...բացեիքաց կը հայտարարենք,

¹⁷ Նույն տեղում, էջ 41:

¹⁸ Նույն տեղում, էջ 144-145:

¹⁹ Ժողովուրդ, Փարիզ, 2. XI. 1945:

²⁰ Նույն տեղում, 16. IX. 1945:

որ ունեւ մեկուն պարտք չունինք վճարելիք, մեր իրավունքներուն և հողերուն վրայ կապրենք պատվավոր մարդու պէս և կը մեռնենք պատվավոր մարդու պէս»²¹:

Դեկտեմբերի 20-ին Թուրքիայի մեջլիսում հանդէս է եկել նաև թուրք գէներալ, ոչ անհայտ Քյազիմ Կարաբէքիրը՝ հայտարարելով. «Լենինը և Չիչերինը շատ անգամ են կրկնել, որ Կարսի դաշնագրով գծված սահմանները վերջնական են: Իսկ եթէ Ռուսաստանը ցանկանում է վերագրավել Կարսի լեռնադաշտը, ապա դա նշանակում է, որ ձգտում է ապահովել ամբողջ Փոքր Ասիայի մեջ իր ներկայությունը»: Ըստ նրա, նեղուցները Թուրքիայի կոկորդոն են, իսկ Կարսի «լեռնադաշտը» երկրի ողնաշարն է, եթէ դա խորտակեն, ապա իբր «իրենք ընդմիջտ կկորչեն»: Այդ պատճառով թուրքերը պատրաստ են կռիւի և զենքով պաշտպանելու իրենց հողերը»²²: Այսինքն՝ թուրքական կողմը հրաժարվում էր բավարարել ԽՍՀՄ-ի տարածքային պահանջները: Ավելի ուշ թուրքական մամուլում հայկական հողային պահանջները որակվում են իբր «մի նոր Մյունխեն»²³:

Խորհրդային Միությունը, իր հերթին, շարունակում էր Թուրքիայի նկատմամբ որդեգրած քաղաքականությունը: Ավելին, նոյեմբերի 21-ին ԽՍՀՄ-ի կառավարությունը հայտարարեց, թէ ծրագրել է ներգաղթ կազմակերպել դեպի Խորհրդային Հայաստան: Որոշ ժամանակ անց, ինչպէս նշվեց, Հայաստանից բացի, Թուրքիային հողային պահանջներ ներկայացրեց նաև Վրաստանը: Դեկտեմբերի 14-ին, Մոսկվայի վեհաժողովի նախօրէին հրապարակվեց վրացի ակադեմիկոսներ Ս. Զանաշիայի և Ն. Բերձէնիշվիլի «Թուրքիայի նկատմամբ ունեցած մեր օրինական պահանջների մասին» վերնագրով նամակը²⁴, որտեղ նրանք Թուրքիային ներկայացրած իրենց հողային պահանջները «հիմնավորում» են՝ «քննության առնելով» իրենց պատմությունը՝ սկսելով խեթերից և սուլթաններից հասնում են մինչև իրենց ժամանակաշրջանը: Նամակը եզրափակվում էր հետևյալ կերպ. «Վրացի ժողովուրդը հետ պետք է ստանա իր հողերը, որոնցից երբեք չի հրաժարվել և երբեք էլ չի հրաժարվի: Մենք նկատի ունենք Արդահանը, Արդվինը, Օլթին, Թորթամը, Սպերը, Բայբուրթը, Կյումուշհանեն և Արևելյան Լազիստանը»²⁵:

Այս պահանջները Թուրքիայի համար նոր մտահոգության առիթ դարձան: Թուրքիայի արևելյան նահանգներում և Տրապիզոնում ցույցեր էին տեղի ունենում: Տրապիզոնում հրատարակվող «Հալք» թերթը դեկտեմբերի 26-ին գրում էր. «Մինչև որ արյան վերջին կաթիլը ցամաքի մեր երակներում, և մեր սրտերը դադարեն բաբախել, պիտի կռվենք՝ պահելու համար մեր հողային ամբողջությունը»²⁶: 1945 թ. թուրքական մամուլը միահամուռ թիկունք կանգնեց իր կառավարության հողային քաղաքականությանը: Հուսէին Զահիդ Յալչընը՝ «Թանին»-ում, Յունուս

²¹ Նույն տեղում, 4. XI. 1945:

²² Նույն տեղում, 26. XII. 1945:

²³ Նույն տեղում:

²⁴ *Правда*, 20. XII. 1945.

²⁵ Նույն տեղում:

²⁶ Զարթոնք, Բեյրութ, 26. XII. 1967:

Նադին՝ «Ջումհյուրիեթ»-ում բացեիքաց արտահայտում էին հակահայկական գաղափարներ:

Հրաժարվելով ԽՍՀՄ-ի հետ խոսել հողային հարցի մասին՝ Թուրքիան 1945 թ. դարձավ Անգլիայի և ԱՄՆ-ի հավատարիմ դաշնակիցը: Եվ չնայած 1946 թ. Հայկական հարցը շարունակում էր մնալ քաղաքական ասպարեզում, սակայն արդեն պարզ էր, որ նույն ճակատագիրն է ունենալու, ինչպիսին ունեցավ Սան Ստեֆանոյում, Բեռլինում, Մերում, Լոզանում և այլուր, որտեղ երբևիցե քննարկվել էր:

Այսպիսով, Երկրորդ համաշխարհային պատերազմից հետո մի անգամ էլ լսվեց Հայկական հարցը: Թուրքիան, ստանալով ԱՄՆ-ի ու Մեծ Բրիտանիայի աջակցությունը, մերժեց ԽՍՀՄ-ի առաջարկները և ԽՍՀՄ-ի հետ խզեց բոլոր դիվանագիտական հարաբերությունները: Մեծ պետությունները չէին կարող թույլ տալ ԽՍՀՄ-ի հզորացումը: Ինչպես նշում էր ԱՄՆ-ի պետքարտուղար Էլչիսոնը, «...այն չափով, որ մեծանա և հզորանա Հայաստանը՝ նույն չափով կաճի ուժը մեր գլխավոր թշնամու՝ Սովետական Միության»²⁷: Հասկանալի է, որ այս գլխավոր թշնամու դեմ պայքարելու համար մեծ տերությունների դաշնակիցներից մեկը պետք է լիներ Թուրքիան: «Տրումենի դոկտրինայի» և «Մարշալի պլանի» իրագործման հետևանքով Թուրքիան ԱՄՆ-ից ստացավ ռազմական և տնտեսական մեծ օգնություն: Փոխարենը ԱՄՆ-ը և Մեծ Բրիտանիան Թուրքիայի տարածքում կառուցեցին իրենց ռազմական հենակետերը: Եվ մի անգամ էլ ոտնահարեցին հայ ժողովրդի շահերը:

Ի. Ստալինի մահից հետո՝ 1953 թ. մայիսին, Խորհրդային Միությունը հայտարարեց, որ Թուրքիայից ոչ մի հողային պահանջ չունի, և այդպիսով վերջակետ դրվեց Հայկական հարցի արժարժմանը:

АРМЯНСКИЙ ВОПРОС В СВЕТЕ СОВЕТСКО-ТУРЕЦКИХ ОТНОШЕНИЙ 1945 Г.

МЕЛКОНЯН К. Ф.

Резюме

В 1945 г. Советский Союз предъявил Турции ряд требований, в число которых входило урегулирование советско-турецкой границы. Тем самым советское правительство преследовало цель вернуть армянские земли, отданные Турции в 1921г. (согласно Карсскому договору). Армянский вопрос, хотя и безрезультатно, вновь формально и не формально стал обсуждаться на всех международных конференциях и встречах, имевших место в 1945-46 гг. В 1945 г. свои земельные требования Турции предъявила также Грузия.

Однако для Турции требования Армении и Грузии были неприемлемы. При поддержке США и Великобритании Турция отказалась выполнить требования СССР и восстановить дипломатические отношения, прерванные в 1945 г.

²⁷ *Անդրեասյան Ա.*, Հայկական դատի նոր հանգրվանը, Բեյրութ, 1967, էջ 24: